

**Enes Karić**

**MERHUM DR. ISMET KASUMOVIĆ  
(1948-1995.)**

Ismet Kasumović rođen je u selu Pode, Travnik 1948. godine. Osnovnu školu završio je u rodnom mjestu 1964, a Gazi Husrev-begovu medresu 1969. godine. U Gazi Husrev-begovoj medresi bio je najbolji učenik svoje generacije. Potom odlazi na studij u Kuvajt, i na Kuvajtskom univerzitetu završava Filozofski fakultet 1973. godine. Po povratku u Bosnu povremeno radi kao honorarni nastavnik u Gazi Husrev-begovoj medresi gdje je predavao retoriku. U ovo vrijeme zainteresirao se za studij trećeg stupnja filozofskih nauka, te se upisuje na postdiplomski studij iz filozofije na Filozofskom fakultetu u Sarajevu. Magistarski rad pod naslovom “Problem nihiliteta u arapsko-islamskoj filozofiji” odbranio je 1979. godine pred komisijom na čelu sa mentorom prof. dr. Abdulahom Šarčevićem.

Doktorsku disertaciju pod naslovom “Ali-dede Bošnjak i njegova filozofsko-sufijska učenja” odbranio je na Filozofskom fakultetu u Sarajevu 1987. godine pred komisijom na čelu sa mentorom prof. dr. Hasanom Sušićem.

Godine 1976. počeo je raditi u Orijentalnom institutu u Sarajevu gdje je prošao zvanja asistenta, asistenta-istraživača i naučnog saradnika. Radio je također gotovo tri godine i na Filozofskom fakultetu u Prištini gdje je predavao arapski jezik. Godine 1981. postavljen je za predavača tesavvufa na Islamskom teološkom fakultetu u Sarajevu. Nakon smrti prof. dr. Ahmeda Smajlovića, Ismet Kasumović preuzima i predmet islamska filozofija. Bio je i glavni urednik “Preporoda”. Ismet Kasumović slovio je kao dobar poznavalac arapskog jezika. Temeljito se bavio kulturnom baštinom Bošnjaka na orijentalnim jezicima. Također, istraživao je filozofske, teološke, tesavvuvske i mnoge druge prinose Bošnjaka filozofskom i tesavvuvskom mišljenju i tradiciji. Objavljivao je svoje vrijedne radove u mnogim bosansko-hercegovačkim časopisima

kao što su: “Prilozi za orijentalnu filologiju”, “Dijalog”, “Islamska misao”, “Život”, “Pregled”, “Odjek”, “Glasnik VIS-a”, “Glasnik UNESCO-a”, “Preporod”. Radovi, studije, eseji i rasprave Ismeta Kasumovića odlikuju se temeljitošću, ozbiljnošću i učenošću.

Za života mu je objavljeno djelo “Filozofsko-sufijsko učenje Ali-Dede Bošnjaka” (1994.) a nakon smrti “Školstvo i obrazovanje u Bosanskom ejaletu za vrijeme osmanske uprave” (1999.) i prvi tom prijevoda Ibn Kesirovog komentara Kur’ana, koji je objavljen u okviru kompletnog projekta štampanog od strane Visokog saudijskog komiteta u Sarajevu. Ismet Kasumović je na ahiret preselio 11. noći ramazana 1995. godine.